

MukaSepuluh

E-mel: bhrencana@bh.com.my

BH diterbitkan oleh The New Straits Times Press (M) Bhd, 31, Jalan Riong, 59100 Kuala Lumpur.

Aras nilai harta lapuk punca PBT rugi kutipan cukai pintu

● PBT memperoleh punca kuasa mereka dalam mengenakan cukai pintu melalui Akta Kerajaan Tempatan 1976, sekali gus memberikan tanggungjawab besar untuk menjaga kawasan jajahannya sebaiknya

● Selagi PBT tidak bebas menjalankan tanggungjawabnya berpandukan akta, adalah sukar bagi PBT untuk menjana pendapatan bagi memberikan perkhidmatan terbaik kepada masyarakat

Oleh Dr Siti Nadiah Mohd Ali dan Nurul Sahida Fauzi
bhrencana@bh.com.my

Aras nilai harta lapuk bagi maksud kadaran atau cukai pintu terhadap fungsi kerja pihak berkuasa tempatan (PBT) sememangnya menjadi polemik dalam pentadbiran dan pengoperasiannya.

Cukai pintu yang juga dikenali sebagai cukai taksiran adalah cukai dikenakan ke atas pemilik harta tanah di negara ini, sekali gus menjadi antara sumber pendapatan utama PBT. Jumlah cukai pintu dikenakan pada setiap harta lapuk bergantung beberapa faktor, termasuk nilai dan kategori harta lapuk serta kadar cukai ditetapkan PBT atas perkenan kerajaan negeri.

PBT memperoleh punca kuasa mereka dalam mengenakan cukai pintu melalui Akta Kerajaan Tempatan 1976, sekali gus memberikan tanggungjawab besar untuk menjaga kawasan jajahannya sebaiknya.

Kerajaan Persekutuan menurunkan kuasa kepada PBT melalui akta dan undang-undang kecil digubal dalam mengenakan cukai pintu untuk menguruskan pentadbiran tempatan serta membayai perkhidmatan awam di kawasan berkenaan.

PBT bertanggungjawab memastikan pemungutan cukai pintu dilaksanakan dengan telus dan mengikut peraturan ditetapkan.

Dalam konteks lebih luas, PBT mempunyai kuasa untuk menilai harta lapuk di kawasan jajahannya melalui jabatan atau unit pengurusan dan penilaian harta lapuk wujud dalam setiap PBT di seluruh negara.

Nilai harta lapuk ini sangat penting dikemas kini kerana melambangkan fungsi unit dan jabatan penilaian harta lapuk berkenaan.

Namun, apa menyukarkan PBT untuk bertindak mengemaskini data penilaianannya adalah kerana kesukaran sesetengah pihak berkenaan memperoleh transaksi harta lapuk terkini dikeluarkan Jabatan Penilaian dan Perkhidmatan Harta (JPPH) di bawah Kementerian Kewangan.

Transaksi harta lapuk terkini penting kepada PBT untuk membuat penilaian harta lapuk menggunakan kaedah perbandingan bagi tujuan menentukan kadar penyewaan, pembangunan dan pencukainan.

Apabila data transaksi harta lapuk terkini gagal diperoleh, ia mengganggu tugas PBT untuk membuat penilaian harta lapuk tepat, sekali gus memaksa pihak berkenaan menjalankan penilaian harta lapuk dengan melantik badan penilaian swasta untuk men-

dapatkan penilaian terbaik.

Ini menyebabkan PBT terpaksa menanggung kos perkhidmatan ikhtisas badan penilaian swasta dilantik, sekali gus menyebabkan kantung PBT ‘bocor’. Jika data transaksi berkenaan dapat diperoleh, tentunya PBT boleh menjalankan penilaian harta lapuk sendiri secara dalaman.

Malah, PBT secara keseluruhan wajar mewujudkan jawatan penilaian harta lapuk yang sudahpun berdaftar dan diiktiraf Lembaga Penilai, Pentaksir, Ejen Harta Tanah dan Pengurus Harta (LPFEH) terutama sebagai peneraju.

Namun, atas kekangan peruntukan, ada sesetengah PBT tidak dapat mewujudkan perjawatan berkenaan walaupun ia kedudukan penting. Oleh itu, hal itu wajar diberikan perhatian oleh pihak Jabatan Perkhidmatan Awam (JPA) terutama kepentingan menguatkuasakaninya secara berperingkat.

PBT berdepan dengan ribuan pegangan harta lapuk dari pelbagai jenis kegunaan tanah. Adalah merugikan jika PBT gagal menggaji penilaian berdaftar sedangkan peranannya begitu besar dalam pembangunan kawasan tempatan.

Campur tangan pihak berkepentingan

Bukan itu sahaja, sebahagian PBT menghadapi situasi tidak ada jawatan pegawai penilaian tersedia, sebaliknya hanya dipimpin penolong pegawai penilaian. Dengan gred jawatan lebih rendah, pegawai berkenaan mengalami kekangan untuk melaksanakan tugas lebih besar kerana di luar bidang kuasa.

Hakikatnya, jika kewujudan penilaian berdaftar tiada kepentingan, masakan Kementerian Kewangan meletakkan JPPH sebagai agensi ditugaskan menilai harta lapuk bagi tujuan percukaian seperti Cukai Keuntungan Hartanah (CKHT) dan duti setem di bawah kawalan kementerian berkenaan.

Lebih memburukkan keadaan, campur tangan pihak berkepentingan dalam pentadbiran PBT menyukarkannya menjalankan amanah dipertanggungjawabkan kepadanya. Contohnya, terdapat PBT terpaksa menyewakan tapak pasar basah serendah RM30 sebulan atas desakan pihak berkepentingan yang kurang faham fungsi dan peranan PBT.

Nilai harta lapuk ini sangat penting dikemas kini kerana melambangkan fungsi unit dan jabatan penilaian harta lapuk berkenaan

Penetapan kadar sewa di bawah nilai pasaran menyebabkan PBT kekurangan pendapatan. Walhal, ia memerlukan sumber pendapatan tinggi untuk menguruskan kawasan jajahan yang luas.

Ibu kebersihan, fasiliti, kemudahan awam dan pengindahan bandar tidak dapat dilaksanakan dengan berkesan, jika pendapatan PBT susut lantaran limitasi pentadbiran dan perundangan yang melekatinya daripada bertindak.

Melihat itu ini, pendapatan terbesar PBT melalui kutipan cukai pintu masih menjadi rintangan dan halangan tidak mampu diselesaikan. Penggunaan aras nilai cukai pintu terlalu jauh dari nilai pasaran terkini, menyebabkan PBT terhimpit antara tanggungjawab dan kehendak pihak berkepentingan.

Kementerian Pembangunan Kerajaan Tempatan (KPKT) perlu melakukan semakan terhadap 154 PBT sama ada aras nilai digunakan munasabah. Jangan pula tahun dinilai adalah 2023, tetapi aras nilai digunakan untuk 1983.

Menyahut seruan KPKT mahu memfokuskan tujah kepada tujuh bidang perlu diperkisasikan seperti membangun dan memperkasa peranan kerajaan tempatan, membangun potensi PBT bagi menjana sumber pendapatan tambahan adalah secara realistiknya berkaitan penilaian cukai pintu munasabah.

Selagi PBT tidak bebas menjalankan tanggungjawabnya berpandukan akta, adalah sukar bagi PBT untuk menjana pendapatan bagi memberikan perkhidmatan terbaik kepada masyarakat di kawasannya.

Adalah satu cabaran besar terhadap PBT untuk memastikan pelaksanaan cukai pintu selaras dengan peruntukan undang-undang. PBT perlu mematuhi undang-undang tempatan dan memastikan proses pemungutan cukai pintu dilakukan secara adil dan sah.

Tanpa campur tangan pihak berkepentingan, PBT mampu pergi jauh, namun jika sebaliknya, PBT hanya akan terus berada di takuk lama.

Oleh itu, Akta Kerajaan Tempatan 1976 perlu dipinda supaya PBT bebas menjalankan urusan pentadbiran tempatan termasuk memperbaiki prosedur penilaian harta lapuk, memperkuatkan pemantauan dan pengawasannya, menyediakan sumber daya yang mencukupi, mengurangkan campur tangan politik mengganggu tugas PBT serta meningkatkan akauntabiliti dalam sistem perkhidmatan.

Adalah penting rakyat memahami tanggungjawab dan kepentingan PBT bagi memainkan peranan aktif dalam memantau fungsinya dan memberikan maklum balas secara terbuka.

Suara masyarakat setempat mampu membantu PBT dalam meningkatkan perkhidmatannya secara jujur dan transparansi, sekali gus dapat mendorong perubahan positif dan meningkatkan prestasi PBT.

Semua artikel penulis tamu adalah pendapat peribadi, bukan pendirian rasmi BH



Pensyarah Kanan Pusat Pengajian Pengurusan Hartanah, Universiti Teknologi MARA (UiTM) Cawangan Perak